

鐵嶺縣志叙



昔在清光緒三十四年秋八月余以是邦民政司使旬宣郡邑北征至于鐵嶺偕令屬僚佐從邦人士登東偏龍首山慨然賦詩曰傷心龍首山前路歸鳥寒林喚余何是時日俄戰後創夷未復日人闢山寺爲樂游原寺旁則日將瘞骨塋在焉望西關飛車如龍蛇起陸日僑屋市櫛比儼然徐福村故不覺其撫圖神傷字隨淚下也民國三年十月余持節重賦度遼制令巡按使須以時巡行道縣察吏良否問民間疾苦利病以聞明年而中日新有盟書之載邦之杌隍遼疆尤構繁緊外懼內訌波譎雲詭而不可揣倪邊樓籌筆日夕旁午卒卒未暇出巡與吾吏民相見今且將還都行有日矣於是鐵嶺令陳

藝纂輯縣書方成以略進乞爲之叙其略曰鐵嶺故有舊志鈔本兩卷康熙丁巳知縣賈弘文叙首邑人士董國祥所輯也頃者邑紳彭錫庚等僉以舊志多未備數百年相望故事闕而待錄遂爲營費設局聘用海城鄭沛綸宜興蔣齡益本邑羅葆恆爲總纂凡爲書先圖後志志凡分四十七目又爲表三其舊志仍附刊別卷而并存之云余以謂方志本周禮春官外史所掌也自爾以來世所著稱爲有體有用者若元豐九域志元和郡縣志天下郡國利病書官私不同可尙則一而康對山武功縣志取裁極簡近人王湘綺桂陽州志湘潭縣志衡陽縣志皆矜矜於文字之雅馴其於古今世界政治往往封固自足以語於體國經野得失之原故未易言深切著明也况其下

焉者乎竊觀陳令藝所與鄭蔣諸君商榷斯志之目例故亦不無文
勝而詳於民事論於中外優劣強弱之勢其爲功旣甚勤其思所以
慎固疆圉以保我子孫黎民之心蓋亦亟矣余故嘉其有成倚裝而
爲之言如此河山大好發奮爲雄是誠在人焉耳是誠在人焉耳民
國四年九月侯官張元奇識於奉天巡按使署

序言

鐵嶺邑志舊有鈔本兩卷爲故家所保存其目錄分建置疆域田賦戶口學校官師祥異人物藝文凡九類稿成於前清康熙之丁巳知縣馮川賈弘文叙首邑紳董國祥實纂輯之歷今二百餘年迄未梓行藝於民國紀元之春來宰是邦將四載矣竊喜吏民安予之拙得優游從事於攷風問俗也因商諸士紳彭錫庚等徵厥舊志建議踵修旋以前存鈔本體例未純謀所以另輯之而以舊志標爲別卷增刊並存衆議僉同遂設局纂輯五閱月而藁脫分爲八卷凡全轄方域以及城池要阨名勝之區皆繪爲詳圖列卷之一志凡四十有七表凡二書旣成藝乃屬邦人士而告之曰邑志者一邑之信史也稽

獻徵文陳詩納賈所以資後人借鏡起百世之觀感者胥於是賴豈惟瀏攬山川侈語人物爲博古家淹通之據哉今試登高而望李寧遠之廬墓存焉當其坐鎮東陲藩籬桑梓英風弈弈猶有可想見者俯視遼河估舶風帆乘流上下土物之屯集其繁庶猶是乎則皆不能無今昔之感也鐵嶺當瀋北要衝至今日而勢愈迫矣甲辰一役陷入渦流乙卯許雜居由是而田園之遷轉人類之紛歧商估之變幻民心之濡染將日移而靡定而地方之趨勢因焉嗣茲以往地方之進化與否惟在自治之精神有以激刺而維繫之吾知二三君子必當有撫今追昔觀是書而興起者則是書之輯攸關於地方也綦重惟是事相因而實剗舊存志畧訖康熙而止雍乾以來其間制度

之損益口戶之消長疆里之分合物產之盛衰幾經沿革人事百變
可以恃爲依據者祇盛京通志一書其他世俗之流傳別集之散見
而蒐羅補苴罔有遺佚詎易易乎故編輯之旨在詳近而畧遠存實
而闕疑俾後之視今得所徵信亦以資其借鏡起百世之觀感而已
矣爲書數語以誌顛末

民國四年七月鐵嶺縣知事陳藝譔

序言

予少時讀盛京通志知鐵嶺爲關左巖邑富庶稱東省最嘗欲攷厥
文物卒不得詳甲寅之夏渡遼來是邦襄陳公漱六幕適其時議修
邑志海城鄭君浚宣實司編輯已草創矣而薦藁於陳公陳公謂予
少能讀書也俾之集其成並次第其節目而總纂之予曰噫此非細
故也胡勝肩雖然入境問禁入國問俗居恒之求詳而不得者一旦
與寓目焉又何幸乎凡事莫難於圖始而志書之編輯爲尤甚大之
而疆域田賦戶口以逮種種政治之沿革小之而草木禽魚與一名
一物之微百千年後莫不由是焉以取證志書者固一邑之信史也
蒐羅未富則失之疏採訪未周則失之漏選擇未精則失之濫考徵

未確則失之虛此編輯之所以難也惟此數難而海城鄭君與邦之
賢士大夫已身先任之予則樂觀其成而已矣四年乙卯書將付梓
陳公謂予當抒一言藉留紀念予垂老也粗獵文史名不足以踰里
閭而萬里橐筆壯心未已或者依附是書俾後人知某年月日曾來
斯土固亦一腐公也何幸如之維仰管甯郟原諸賢羈僑遼左或清
議格物或閉門著作卒之皆聲聞洋溢殊滋媿耳然則是書之成而
予幸躬逢之實蠅之得驥也胡可無一言以誌其後至書之顛末按
使張公暨監督陳公兩叙俱詳述焉故不贅
民國四年七月宜興蔣齡益序於鐵嶺縣署

鐵嶺縣志序

縣志失修久矣庚倦遊後勸助地方公益近二十年每與同人談及輒心躍躍欲試究因文獻無徵經費難籌欲作而終輟者數年於茲矣民國甲寅秋縣長陳公熱心提倡籌撥捐款聘宜興蔣君海城鄭君總司修纂邀邑紳羅君陳君等多人分擔職務相助爲理設編輯處於商會飭庚就近董理其事調察四出屬橐三易迄歲終而全書告成付印之前命庚序文以誌庚自卜居近市湫隘囂塵未敢附於江淹才盡然筆久無花詎足與於論文之列乎但義有難辭謹掇數言述其顛末願無忘陳公盛舉暨諸君苦詣而所冀我地方蒸蒸日上化者抑亦未有已也時民國四年乙卯三月吉日彭錫庚謹識於鐵

嶺商會事務所之辦公室

鐵嶺縣志

弁言

二十紀之世界非習常蹈故泥古守文及剽竊一二新說不求實際所能生存者也。颶發雲譎海立山摧全球潮流不知伊於胡底一國且可以無論若彈丸一邑則更可以無論蓋自洪荒造人以來幾經浩劫演至今日心性之險詐極矣生活之艱難極矣文明愈進慾望愈增於是羣出攘奪之途舉世眼光惟注於權利而已矣得權利者則壟斷壟斷則思把持失權利者則缺望缺望則思破壞及得爲失而失爲得仍如一邱之貉人禍相尋人類爲萬物之最虐彼國與國爭人與人爭何一不出於此乎此厭世者所以抱悲觀也夫人生日

衆不可不進化以應其求陶復陶穴之制姬周末嘗久因之衣皮飲血茹毛雖信而好古之聖人亦不能再爲之故生今反古如障江河之趨海欲復之於崑崙徒見其勞而無功而維新尙焉然鐵血主義未必非禍亂之階破迷信倡均產窮其究竟亦足以滋陰惡而胎內亂膚淺學理每不足恃也鄙人等惟怯無能於吾民國三年秋奉吾縣監督陳公委囑纂修鐵嶺縣志搜殘補缺隸事屬辭而舊志失於簡略僅有二卷乃成於清康熙間者其時君主專制行政旣爲草創持論尤多諱飾後曠二百餘年繼之者皆鮮存藁措手無從茫然四顧其何能爲且是時也正歐洲戰事方殷之時也舉數百年來之血腥史所謂十字軍之征滑鐵盧之役綏丹之陷波蘭之分不啻同現

於今日而一星之火飛渡重瀛燒點且及山東青島東西洋闕如哮
虎我等方據案枯坐拾殘文於斷碑廢紙中亦國家社會最無用之
棄人矣然而晝夜勤劬愚者千失不無一得竊以爲居今日以言救
正舊新政學皆當改革趨於中和之軌中和之軌者惟道德實業是
也他皆後焉有道德而後不爲權利之競爭有實業而後競爭權利
亦不出於險詐傾覆於是游民日少澆俗日敦倘天道有知世運大
同祇此二者已足以消兵氣而光日月卽令不然尙足爲國家之干
城外交之奧援也所以鄙人等纂集掌故輿地政治而外凡忠節孝
義貞烈及農工商鑛各志尤爲殷殷一域之見不足恢宇宙大觀但
杜牧罪言或亦識者所不廢耳編成就正謹誌其崖略云鄭沛綸識